

L'èrt é femena

Per endrez de la sociazion «La Voce delle Donne», ence ch'est an l'è stat endrezà la mostra coletiva «ARTèDONNA», pissèda per ge dèr luster a la voa de esprescion e al talent artistich de la femenes de Fascia e Fiem.

En colaborazion col Comun de Moena, te la sala Minicivica te Ramon se pel veder la operes realisèdes con tecniches e sogec desferenc da 15 artistes: vèlch una cognosciuda o che aea jà tout pèrt a chesta scomenzadiva, endrezèda ence ti egn passé te desvalives pajes de la doi valèdes, autres deldut neves.

Te l'esposizion fèsc spaco na gran teila col soreie che fioresc sul mèr de Valeria Battel da Fontanac, na fegura de ela zevila zipièda tel legn da Lara Steffe da Moena e amò l'aereo, tem preferi da Maria Pia Desilvestro. Tron dapò besties fates da Marisa Tirabassi che somea veres, de bie fiores depenc con colores a èga da Gerda Christin e na gran teila lumenousa de Daniela Bernardi.

De gran intensità i musc-mèscra de Arianna Sartini, originèl l Mandalismo Aborigeno de Valentina Michelutti e amò l'è i depenc de Clotilde Brigadoi, Francesca Morandini, Annamaria Giovannini, Marcella Dagostin e Milena Daprà, e la ceramiches decorèdes da Marisa Iori e Liliana Delvai.

L'esposizion é da poder veder enschin en lunesc ai 22 de messèl da les 17:00 a les 19:00 e da les 21:00 a les 22:30 LG



La operes de «ARTèDONNA» a la Minicivica de Moena.